

CANTYJA 'NAAⁿ' TSJOOM XQUEⁿ TA TYUAA TANIOM



CANT. JA 'NAAⁿ. TSJCOM XQUEⁿ TA TYUAA TANIOM

Matseiljoiya chiuu waa na tui na tsoatyeeⁿ tsjoom enjoo
xqueⁿ Ta Tyuaa Taniom.

Luaa waa na tui e la na t cwii mastro jo jndaa yuu na
m'aaⁿya. Ndo' yuu na m'aaⁿya jndyuaa' Tsjo' T'maⁿ. Ndo' m'aⁿ
nt'omcheⁿ nn'aⁿ yuu Natjom Ljo' T'maⁿ joo na ndyeticheⁿ. Ndo'
quia na tuee' mastro teijndaa' na nncuaa scwela na nla'naaⁿ
yocanch'u. Jo' chii tui cwii xque' na nncuaa clase.

Luaaⁿ tui quia na jndye nn'aⁿ na m'aⁿ Natjom Ljo' T'maⁿ.
Joono l'ue n'omna yuu na m'aⁿ na nncuaa scwela. Jo' chii teijndaa'
na tui cwii jomnta na cha'tso nn'aⁿ na m'aⁿ Tsjo' T'maⁿ Nequio
nn'aⁿ na m'a' Natjom Ljo' T'maⁿ. Jo' chii teijndaa' na nntsaa-
cant'iaayâ yuu na nluii w'aa scwela. Jo' chii saawaayâ Natjom
Ljo' T'maⁿ. Squiaayâ Natjom Ljo' T'maⁿ. Tyont'iaayâ yuu na
nncuaa scwela saa ticjaawee' n'om nn'aⁿ na jnaⁿ Tsjo' T'maⁿ na
jeeⁿ cwa jndii jo'. Jo' chii jnaaⁿ ndaa'â Natjom Ljo' T'maⁿ.

Saalwaa'ì squiaayâ xqueⁿ Ta Tyuaa Taniom. Jo' cwint'iaayâ na ya nncuaa tsjoom, ee mat'maⁿ su m'aaⁿ jo' jo' na nluii l'aa scwela ndo' nncuaa cancha. Cha'tso nn'aⁿ na m'aⁿ 'ndyoo Tsjo' T'maⁿ tjawee' n'omna na jo' nncuaa tsjoom. Saa nn'aⁿ na m'aⁿ Natjom Ljo' T'maⁿ tatinquiona ñ'eⁿndyô ee joona l'ue n'omna yuu na m'aⁿna nncuaa tsjoom. Saa jâ jnda tjawee' n'ooⁿyaⁿ na xqueⁿ Ta Tyuaa Taniom na nncuaa tsjoom, meiiⁿ na matquia m'aaⁿ ndaa ee na su jo' jo'. Jo' chii mantyja teijndaa' nn'aⁿ na nluiitquiendye na njndoc' n' nluii w'aa scwela, ndo' mana jnaⁿra' na teijndaa' na tyecalui' xjeⁿ na teindyuaa nataa.

Jnda chii mana tuii w'aa scwela. Ndo' mana tquiowa nn'aⁿ na m'aⁿ 'ndyoo Tsjo' T'maⁿ. Ndo' mati nn'aⁿ na m'aⁿ 'ndyoo Tsjo' Niom' tquiowana. Laa'ti' waa na tjawijndyendye nn'aⁿ xqueⁿ Ta Tyuaa Taniom.

Saa je' luaa waa xuee'na' Tsjoom Tsjo' T'mⁿ ee na nn'aⁿ
Tsjo' T'maⁿ m'aⁿ. Saa mati nn'aⁿ na m'aⁿ Natjom Ljo' T'maⁿ
maxjeⁿ tica'ndyenc'uaa'ndyena. Maxjeⁿ taⁿ nquians mastro. Jo'
chji je' waa w'aa scwela.

Laa'ti' waa na tuii. Mantyjati luaa'ndyo.

Luaa seiljeii Alberto Melquiades Gómez

Autor y dibujante: Alberto Melquiades Gómez

Idioma: Amuzgo de Xochistlahuaca, Gro.

Esta edición consta de 50 ejemplares

Centro Manuel Gamio, Ixmiquilpan, Hidalgo

Agosto, 1984

Esta historia pequeña relata como fundaron un pueblito que se
llama Arroyo Grande.